

ROMA

M A G A Z I N

#7, Juni 2017

TRADICIA

Romano Dive

RECEPTI

Felija

HISTORIA

Grčko mitologija

SPORT

Romano
Turniri

ROMANO TURNIRI
Mjölby 2017
www.arlicenter.se



E redaktoresoro lafi

Oven saste sarine so čitinena akava unikatno magazin. Komplimentia resena kotar sa o strane hem amen ki redakcia hijam but bahtale sebepi so o manuša cenenina akava pozitivno cilji so isi amen. Fenomenalno respons dobinđam hine ko *Magazin Rom 6* akala palune masekia. Specialno hem but zoralji podrška akava puti reslja kotar amare pendžarutne artistia sar ko primer o Ramko, o orkestar Plave Zvezde, o Zoran Šabanovic, o Adil, o orkestar Gazoza, o Bernati, o Ervini, o Tarkani, i Đefrina... sarine tane impresionirime e magazineja hem sa vileja podržinena akava projekti.

Amari publika svako dive barjola, sebepi sar so dikhaja ko *Google Analytics* i statistika palo svako nevo broj ovela pobari. Ko *Magazin Rom 7* nastavinaja zalo kvalitet te ovel amen hem o kvantitet. 20 strane hem ko akava broj isi.

Hem akava puti o Kulturådet hem o Språkrådet odbinđe amari molba. Nek oven saste sarine so bešena ki referens-grupa! Ama, so ka pharavav moklo šero oljencar. Pa, me đi akana celo akava projekti kokri finansirindum hem apsolutno ništa na falini. Svako Rom ki akija planeta šaj te khuvel ko www.magazinrom.com hem badihava te čitini. Ked mangela, kaj mangela!

Šaj dikhlijen, hine amen jekh fudbalsko turniri ki Mjölbry. Akalje drumoja mangava te zahvalinav man sa e Romendje so alje te barjačeren odova dive. But Roma alje, kotar but dizja. Na hine amen nisave problemia! I publika respektirinđa e igračen, o igračia respektirinđe e sudija. Hajbe hem pijbe hine badihava. O finale bitinđa ko trin o sati račate, a amen o organizatoria čistindam i sala đi ko 6 o sati sabalje. Ako dija o Devel hem aver berš paljem ka organizirina jekh esavko turniri hem šukar ka nakha!

Ma bistren! Sar đi akana so finansirindum akava projekti, ađahare hem pana ka nastavinav. Barem te resa đi ko *Magazin Rom 10*! Palo odova, ka dikha sastipe...?

Sarine tumen so čitinena o *Magazin Rom*, slobodno šaj te kontaktirinen amari redakcia ako isi tumen disavo pučibe, kritika ja idea. Mangava tumenđe jekh šukar hem tato nilaj!

Seljami kotar
Sead Šerifi - Seja



Redakcia:

Brima Gudinci, Ilija Rajkovic - Icko,
Emran Murina, Sead Šerifi - Sejo,
Mirsad Šerifi, Dennis A. Demirovic - Pipi

Slike:

Sead Šerifi - Sejo
Safet Sadiki
Free Images
Privatno arhiva

Dizajn:

Sead Šerifi - Sejo

Autor hem glavno redaktori:

Sead Šerifi - Sejo

ISSN:

2002-195X (Online)
2002-1968 (Print)

Kontakt:

info@magazinrom.com

www.magazinrom.com
www.arlicenter.se

Produkcia:

A r l i c e n t e r
kunskapscenter

Amendar

O *Magazin Rom* tano jekh kvartalno hem badihava internet-magazin. Amaro fokus tane o Roma, a amari primarno idea tani te vazda e Romengoro interes e čitibase. O teme ko magazin šaj te oven kultura, integracia, svakodivesoro đandipe, informacia, muzika, sastipe, ajgara, nevipe, historia, kariera... O *Magazin Rom* ka ovel jekh forum kuri o Roma kotar celo sveto šaj te diskutirinen razna teme, te vačeren jekh bitno informacia, te reklamirinen pe..., znači o magazin ka barjol hem ka asimilirini pe premalo e Romengere kritike hem premalo Romengoro čefi! Amen ka počmina te pisina ko Arli dialekti, ama phravde hijam hem dijekhvar te publicirina artiklia ko avera Romane dialektia. O *Magazin Rom* ka koristini žanria hem stilja sar ko primer humor hem satira, ama amen na mangaja nikas te dukhava hem te holjančera. O moto kotar o magazin tano te pisini pe odija čhib sar so vačeri pe čhere! Zalo amari Romani čhib, jekh artikli ka pisina ki Švedsko čhib, sebepi amen o Roma kokri mangaja te bičala i korektno informacia kotar e Romengiri historia, čhib, kultura, adetia...

O magazin "Rom" tano bizo profiti! Iniciativa te čerel pe jekh esavko projekt ijljela o Sead Šerifi – Sejo. Ov kontaktirinda fantastična manušen kola bizo problemi prihvatinde akava izazov. Sarine biđidje akija idea hem sarine prihvatinde te pisinen badihava, bizo pare!

Ako isi tumen disavo pučibe, idea ja komentari pisinen amendje ko: info@magazinrom.com

Om oss

Tidskriften *Magazin Rom* är en online-kvartalstidning, som innehåller allmän kunskap, kultur, nyheter och information. I första hand tidskriften vänder sig till romer, men även vill hjälpa svenska myndigheter, olika organisationer och alla andra som är intresserade att göra skillnad, bidra till kulturen på olika sätt och utöka sina kunskaper om romer, romarnas historia, kultur och tradition. På det sättet ska vi tillsammans försöka bekämpa diskrimineringen, samt bevara mångkulturella verksamheter.

Ko akava broj:

Romadagen.....	5
Romanos Turniri.....	6
Grčko mitologija.....	8
Plastično flaša.....	10
Felija.....	11
Rabie Ramadani hem olakiri poezia.....	12
Arakh toklo vilo, arakh toklo đivdipe.....	13
Champions League.....	14
Pendarde anava.....	16
Da li đanđan so...?.....	17
Romani ajgara.....	18
Romanos Dive.....	19

Hajde te sikljova Romani Arli Alfabeta

Šaj te poručine ko: info@arlicenter.se



Hajde te sikljova Romani Arli Alfabeta 1
ISBN: 978-91-982463-0-8

Hajde te sikljova Romani Arli Alfabeta 2
ISBN: 978-91-982463-1-5

ROMADAGEN



Norrköpings Romer - Suzana, Adam, Seferim och Nadja

8 april - Romernas Internationella Dagen

För 46 år sedan samlades romska aktivister på den första kongresen i London. Då fick man rätten att vara rom! **8 april 1971** presenterades vår flagga, samt nationell sång.

- Denna dag vill vi lyfta upp genom att samla större antal romer att umgås, att lära känna varandra och visa respekt. Med ett ord, att visa gemenskap, säger *Seferim Murina* som är ordförande i organisationen *Norrköpings Romer* och fortsätter med sitt inspirerande tal. Idag firar vi vår dag och vi från Norrköpings Romer har planerat en lång tid tillbaka att anordna ett förstklassigt evenemang. Idag är med oss dem stora stjärnor inom den romska musiken - *Ramko* och *Zoran Sabanovic*, som får stöd av orkestern *Leskovacka Zvezde*. Våra tjejer från folklorgruppen kommer att dansa. Det finns även en DJ som heter *DJ-So čereja* och hip hop grabbarna *Hevzi* och *Seid*.

- Jag känner mig fantastisk när jag ser romerna samlade för att fira den här dagen. Detta är vår största högtid. Jag önskar alla romer att fortsätta bli bästa i världen, säger den kända vokala artisten *Zoran Sabanovic*.

- Det är fantastisk bra att det finns unga och utbildade romer, säger den levande legenden *Ramadan Bislim – Ramko* och fortsätter. Dessa briljanta unga männskor arrangerar sådana evenemang för att samla romer på en plats och berätta till dem vilka är dem, varifrån kommer dem och hur betydelsefull är deras romska identitet. Vi är viktiga!



Zoran Sabanovic och Ramko

Romano Turniri

7. April hine amen jekh fudbalsko turniri ki Mjölby. O interes hine but baro! 14 ekipe, prekalo 200 igračia hem totalno koro 500 manuša hine ki sala đi ko 03:00 o sati račate. Akava turniri organizirinda o Arli Centar, a partneria hine i Mjölby komuna, o Bostadsbolaget hem o Norrköpings Romer. Glavna koordinatoria hem o sebepi sose akava turniri ulo jekh but baro suksesi tane o Sebastijan Hasani, o Sefet Sadiki hem o Sead Šerifi - Sejo.

Ko turniri hine hajbe, pijbe, čhelibe, asajbe - sa badihava! Amaro buđeti ko turniri hine 5 000 krune, ama i sloga hem o pozitivno cilji čerđa te dičhol sar 50 000 krune.

Akalje drumoja mangaja te čera harljija:
Denis Bektaševic - najšukar golmani
Sebastijan Hasani - najšukar igrači
Ferid Kadriu - najviše golia
Gurbet Centar - "fair play" ekipa
Norköpings Romer - trito than
Magazin Rom - dujto than
Amala Marielund - jekhto than
500 Roma so hine ki sala - SLOGA!!!



SPORT



GRČKO M


Grčko mitologija - but purane paramiza ko jekh than.

O teme ko akala paramiza tane o Devel, i natura hem o heroja kotar purano vakti. O paramiza tane but purane, ama okova so pendaraja avdije, odova tano so o poeti o Hesiodos čerđa i struktura kotar i Grčko mitologija. Sizif, Iliada, Odiseja hem avera tane najpendarde paramiza ki Grčko mitologija. Ko akava artikli ka prezentirina tumenđe samo disave aktoria kotar i Grčko mitologija te ovel tumenđe interesantno hem ađahare mangaja te čhiva tumen te čitinen celo Grčko mitologija.



AKILES

Hine baro heroj! Ov hine ekvaš manuš, ekvaš Devel. Olje pharo hine te mudari pe, sebepi ked hine čavoro oljesiri daj mukhlja olje ko jekh pani so hine magično. Ko celo trupi ov hine sastto hem zoralo, samo na ki patum kotar oljesiri daj ičerđa olje ked čhvđa olje ko odova pani. Ked o maribe astrada ki Troja, o Akilles delo ko askerluko. Oljesoro najšukar amal hine Patroklos. O Trojansko princo, o Hektor mudarđa hine e Patroklose. Tegani o Akilles hine but holjamo. Palo jekh vakti o Akilles ikalđa poklo hem mudarđa e Hektore. Akana holjanđa o Paris, e Hektoresoro phral. O Paris pogodinđa e Akilese jekhe strelaja baš ki patum hem o Akiles mulo!



HERKULES

O Herkules hine ki grčko mitologija vičini pe Herakles. O Herkules hine čhavo kotar o Devel, o Zeus. Ama, oljesiri daj hine obično manuš. Oljesiri daj vičini pe hine Alkmena. O Herkules hine but zoralo hem čerđa diso so vičini pe *dešudujengoro fenomeni*. Sar so phenela i Grčko mitologija, tegani o Herkules mudarđa but bare hem zorali životinje, lošna demonia, zmaj duje šerencar...

MTOLOGIA



AKALA INDIVIDE HINE OLJEN TITULA DEVEL

Zeus - Ov hine sa Devljengoro kralji hem najzoralo sarinendar. Barabar peklje romnjaja e Heraja, beštindža hine ko brego, ki Olimpia. O Zeus hem i Hera hine oljen but čhave.

Poseidon - Ov hine e panjesoro Devel hem e Zeusesoro phral. O Poseidon hine olje stalno jekh bari hem zlatno viljuška zalo peste. Odija hine oljesiri altija.

Hera - E Devljengiri kraljica hem Devel kotar ničaj. Oj hine but holjami hem but droma čerđa problemia peklje romese e Zeusese.

Herkules - Oljesoro dad hine o Zeus, ama oljesiri daj hine obično manuš. Odoljese o Herkules hine samo ekvaš Devel.

Hades - Ov hine Devel kotar o mulje. O Hades hine phral kotar o Zeus hem o Poseidon. Ov hine Devel bizo duša.

Afroditá - Mangipasoro Devel! Olakoro rom hine e kovačengoro Devel o Hefaistos, ama oj celo poklo đivdipe manglja e Arese. O Ares hine e maribasoro Devel.

Meduza - Hem oj hine sar Devel. Olakere bala hine kotar sapa hem sarine so dikhlje ola ko jačha, ulje tano ano bar.

Plastično flaša

PET ja PETE tani najpopularno plastika so koristini pe ki produkcia. Popravilno, i plastika tani čerdi te ovel samo jekhvar koristimi, sebepi svako aver upotreba šaj te bajračeri o rizik kotar bakterie. Akala flaše šaj te mukhen phare metalia hem hemikalie so ka smetinen amare sastipase.

HDP ja HDPE tani zoralji hem grubo plastika. O ekspertia phenena so akija plastika tani najsasti hem najsigurno. Odoljese o pani ovela najšukar hem najčisto ki akija flaša.

PVC ja 3V tani kovlji hem fleksibilno plastika, koja mukhela štetna toksinia. Pošukar ka ovel te arakhel pe aver alternativa kotar akija flaša, ako šaj.

LDPE plastika na koristini pe panjese, hem ako na mukhela otrovna hemikalie. Nane šukar ni o habe so tano pakuimo ki akija plastika te čina. Sebepi zalo habe šaj hem te nakhava o ulje so mukhela i LDPE plastika.

PP ja polipropilen, tani parni ja providno plastika koja koristini pe te pakuini pe o sirup ja o jogurt. Akija plastika tani zoralji hem lokhi, hem but šukar cidela pestar o tatipe. Isi ola šužo kvalitet hem na mukhela bakterie ja hemikalie.

PS ja polistiren, tani jeftino plastika, lokhi hem šaj te koristini pe but putija. Esavki plastika šaj te dikha ko čaše, roja, čhurika hem čare habese ked ikljovaja ko piknik. Ama, akija plastika ko but baro tatipe šaj te mukhel kancerogena hemikalie.

Odoljese, ov mukajeti savi plastika čineja!



HABE

PURUANO ROMANO TRADICIONALNO HABE

FELIJA



Valjani:

- pani
- varo
- lon
- zetini

Valjani te arakhe jekh than kaj šaj te thare jag. Ma bistre te ovel tut pani zalo tute, sebepi te na čere disavi beda! Ama, angljeder te thare i jag valjani te čere o humer. O humer astareja ki jekh vangla adahar so čhiveja pani, varo, lon hem zetini. Kober g hem *dl* ka ḫal, sa zavisini kober tani bari i tepsiya hem kober ḫenende spremeineja i felija. Akana sa odova so čhivđan ki vangla, valjani te mešine šukar. O humer valjani te ovel sar palačinkende. Te čere felija, valjani tuče voršniko hem jekh bari tepsiya. Akana šaj te thare i jag! O praho kotar jag valjani te čhive upral ko voršniko (dikh i slika), te tačol. Akana ki tepsiya čhiv o humer, samči te crtine o trkalo ko amaro bajrako 🌟. Ked uljan gotovo, šaj te lje o tato voršniko hem te čhive upri tepsiya te pečol o humer. Ma ičer o voršniko upri tepsiya pobuter kotar jekh minuti, sebepi te na thabljol. Palo so ka ikalje o voršniko kotar tepsiya hem paljem te čhive olje ki jag te tačol, makħ hari zetini i kora ki tepsiya. Sa akava čer pana 30-40 putija, di na pherđola i tepsiya sar so dičhola ki slika. Ma bistren te pekhen hari paprike ki jag. Han i felija sastipaja!

Rabie Ramadani

hem olakiri poezia



I Rabia Ramadani avela tani kotar Gilana, ama avdije bešela ki Linköping. Oj tani ženimi hem isi ola trin čhave. Poezia ki Romani čib počmija hine te pisini pana ked hine ola 10 berš. Oj čerela avdije buti sar sikavni ki dajakiri čib ki Linköping komuna, a amen isi amen but bari čast so šaj te publicirina akava šužo diki.

TU HEM ME

Kotar klo manglipe,
bašalava sar orgulja.

A klje šuže vasta,
ked doljena mle vasta
đanena so me mislinava.

Mlo sa so isi man andral
ov tano sar jekh instrumenti,
kova so vičini pe harfa.
Hem tu osetineja odova,
ked doljeja mle vasta.

Amen duj počmindam nisostar.
Andam but baro manglipe.
Manglipe so ka ičeri bute beršenge.

Butberšibe so ka del nuri,
amare dušake.
Odova manglipe so nane nikas pravo
te phenel "na, našti".

Mange hem tuke akava manglipe
dendo kotar amari vera.
Vera e manglipasiri.

Amen hijam jekh duša.
Tu hem me!
Arakhaja amen hem našalđovaja.

Tu ano mande,
me ano tute.

Jekh but hor manglipe.
Sebepi so maškarlo mande hem tute,
nane ništo soj tano ni me, a ni tu!

Arakh toklo vilo, arakh toklo đivdipe!



But tano važno amaro vilo te ovel sasto hem te čerel šukar buti. Lošno parvaribe, slabo fizičko aktiviteti, cigare, baro holesterol, baro pritisak hem avera faktoria čerena amaro vilo te ovel slabo, a odova nane hič šukar amendje. Bizo korektno parvaribe hem vitaminia kola valjanena amendje, o vilo na dobini dovoljno energija hem ovela slabo. O stres bajračeri o rizik te ovel o vilo pana po slabo. Sa akava igari ko infarkt! Phanljona e ratesere drumija, o lošno holesterol phandela o vene, o rat više nane olje kaj te đal, pa o mišičia kotar vilo ačhovena bizo kiseonik. I masa kotar mišičia slaboni hem ađahar avela đi ko infarkt.

Okola manuša so več hine oljen infarkt, on obavezno valjani te pijen peklje hapia, sebepi oljengoro rat te ovel šukar hem te na phanljon e ratesere drumija. Valjani pohari te irini pe i normalno kilaža, sebepi palo infakt našalji pe i kilaža. Fizičko aktiviteti tano šukare, ama na preterano but, sebepi te na ovel pharipe e vilese. But tano važno o korektno parvaribe, te ovel bizo but masnoča hem šičeri.

Pošukar te čhinave ko vakti, nego podosna te cide hem te sastljare. Barem jekhvar ko berš valjani te đal pe ko kardiolog ki kontrola, te merini pe e ratesoro pritisak hem redovno te čerel pe analiza kotar rat hem holesterol.

UEFA CHAMPIONS LEAGUE

Akalje beršesoro finale čheljela pe savatone 3. Juni kotar o sati 20:45 ki Kardif, Vels.

Ko finale resena pe duj bare šampionia, o Real Madrid hem o Juventus.

Kristiano Ronaldo, Dibala, Marselo, Bufon, Benze-ma, Higuain... i lista tani but bari. Savatone ka ovel amen šansa te dikha e šampionengere šampionen!

Ama, angljeder o sudija te čhivel i pištaljka ko muj hem akava magično momenti te počminel, šunaja i himna kotar i "Champions League". Odija melodija khuvđa amenđe hem ko šero, a hem ki godi. Ama, but phareste šaj te haljova o lafia so đilabena. Akana ka vačera tumenđe hari fakta kotar akija đilji.

I himna komponirinda o Britansko kompozitoru, o Toni Briten (Tony Britten). Oljese hine inspiracia o Đorđ Fridrih Handel (George Friedrich Handel) kova hine but penđardo Germansko-Britansko kompozitor angljeder 300 berš. I uvertira bašalji o filharmonisko orkestar kotar London, a i đilji đilabi o hor kotar Akademija Saint Martin.

I UEFA (Union of European Football Associations) isi ola trin oficjalna čhibja. Aðahare hem ki "Champions League" himna koristini pe trin čhibja - Engleski, Francuski hem Germanski.



O simboli kotar "Champions League"

Akala tane o original lafia:

Ce sont les meilleures équipes

Es sind die allerbesten Mannschaften

The main event

Die Meister

Die Besten

Les grandes équipes

The champions

Une grande réunion

Eine grosse sportliche Veranstaltung

The main event

Die Meister

Die Besten

Les grandes équipes

The champions

Ils sont les meilleurs

Sie sind die Besten

These are the champions

Die Meister

Die Besten

Les grandes équipes

The champions

Akala tane sa o šampionia:

1956. Real Madrid	1969. Milan	1982. Aston Vila	1995. Juventus	2007. Milan
1957. Real Madrid	1970. Fejenord	1983. Hamburg	1995. Borusija Dortmund	2008. Mančester Junajted
1958. Real Madrid	1971. Ajaks	1984. Liverpul	1996. Real Madrid	2009. Barselona
1959. Real Madrid	1972. Ajaks	1985. Juventus	1997. Mančester Junajted	2010. Inter
1960. Real Madrid	1973. Ajaks	1986. Steaua	1998. Real Madrid	2011. Barselona
1961. Benfika	1974. Bajern Minhen	1987. Porto	1999. Bajern Minhen	2012. Čelsi
1962. Benfika	1975. Bajern Minhen	1988. PSV	2000. Real Madrid	2013. Bajern Minhen
1963. Milan	1976. Bajern Minhen	1989. Milan	2001. Milan	2014. Real Madrid
1964. Inter	1977. Liverpul	1990. Milan	2002. Porto	2015. Barselona
1965. Inter	1978. Liverpul	1991. Crvena zvezda	2003. Liverpul	2016. Real Madrid
1966. Real Madrid	1979. Notingem Forest	1992. Barselona	2004. Barselona	2017. ???
1967. Seltik	1980. Notingem Forest	1993. Olimpik	2005. Milan	
1968. Mančester Junajted	1981. Liverpul	1994. Milan	2006. Mančester Junajted	

I lista tani hujjavdi kotar i oficjalno internet strana uefa.com



O pokalia kotar "Champions League" ko stadion Kamp Nou ki Barselona

PENĐARDE ANAVA

GOOGLE, IKEA, APPLE ... SARINE PENĐARENA AKALA BARE BRENDIA. AMA, HAJDE TE DIKHA SAR ULJE TANE PENĐARDE HEM SO ZNAČINI OLJENGORO ANAV.



- "Lego" tani kombinacia kotar duj Danska lafia so ko Romane značini – čhel hem asa.
- O Stiv Đobs dinđa peklje firmače o anav "Apple" premalo oljesoro favorit voče, i phabaj.
- "Adidas" dobinda o anav kotar o osnivači Adolf Adi Dasler.
- "Nike" avela kotar grčko mitologija, a o simboli tano metafora – drumo đi ki pobeda.
- O anav "Google" slučajno ulo! Ko prvo plani valjanđa te ovel hine "Googolplex", ama jekh studenti pogrešno vačerđa hem ađahare ačhilo "Google".
- "Audi" ki Latinsko čhib značini - šun. A jekh kotar o osnivačia vičini pe August Horch. "Horch" ki Germansko čhib značini – šun.
- "IKEA" isi ola o prva bukve kotar o osnivači Ingvar Kamprad hem o prva bukve kotar jekh imanje hem kotar jekh gav kuri ov barilo – Elmtarid hem Agunarid.

... ko sveto isi pobuter isi
khanja nego manuša?



... o prvo *Burger King*
phravdilo hine ki Majami e
beršeste 1954?



... e žirafakiri čhib tani
dlogo prekalo ekvaš metra?



Da li đandan so...

... keda e dizjakoro anav
Rio de Ženerio irineja
ki Romani čhib ovel -
e Januaresiri ljen?



... prvo puti *Ijiljitka pare*
koristisalje ki Kina?



... kokri tut našti te *gitkine*
hem te asa?



ROMANI AJGARA



Palo disave berša reslje pe o Gras hem o Her.

Gras: Ooo... pa kaj hijan tu Hera?!

Na dikljum tut ače 10 berš!

Her: Ače bre... buti-čhere, buti-čhere.

Gras: Ajde molinava tut tajsa sastipe te ave koro mande ki kafa.

Her: Ako bre nane problemi.

I čače tajsa dive o Her đelo ko Gras čhere hem so te dikhel, vila bari, boro baro, slike kotar na... barvalipe nane kaj više!

Her: Grasta, e but bre barvalo hijan!

Kotar tuče sa akava barvalipe?

Gras: Pa ače 10 berš me hijum but pendardo umetniko. Meklje slike vredinena milionia!

Baro inati khuvđa e Here, sebepi aver dive valjani o Gras te avel koro oljeste.

A, o Her tano čorolo hem bešela ki jekh kaštunali koliba. Ama, o inati tano baro!

So te čerel o Her, đal te slikini e Zebra hem te umlavi e Zebrasiri slika ko duvari.

Palo disavo vakti alo o Gras ko Her. Pijela i kafa hem dikhela.

Gras: Hera... a, akija slika akate... soj odova?

Her: Ahhh... odova angljeder 10 berš, ked čhelđum hine ko Juventus!

Vačeri i romni peklje romese.

Romni: Isi dokaz so o čavoro dobini čak 80% inteligencia kotar i daj.

Rom: Eee... a, kotar dad kobajagi samo 35% ?!

Bešela o tikno Babuši zali piklji daj hem pučela.

Babuš: Mama, a sar uljam amen o manuša?

Mama: O Devel čerđa amen!

Babuš: Ama, o tata phendā so uljam ando majmunia?

Mama: Mo čhavo, me vačerava tuče akana andi miklji familia.

A, tegani toklo tata vačerđa tuče andi oljesiri familia!

Samo o vampiria isi oljen saste danda!!!

ROMANO DIVE



Norrköpings Romer - Suzana, Adam, Seferim hem Nadija

8. April - E Romengoro Internacionalno Dive

Angljeder 46 berš čedisalje o đande Roma kotar celo sveto ki London. Ko akava dive o Rom dobinda poklo pravo te ovel Rom! Ko akava dive o Rom dobinda piklji himna hem poklo bajrako.

- Akava dive amen mangaja te vazda olje upre, te sastavina amare Romen so poviše, te ova zajedno, te družina amen hem te manga amen. Te ova složna, te ova jekh! Ka del o Devel te ovel amen jekh bari sloga maškaro amende o Roma, vačeri o Seferim Murina kotar i organizacija Norrköpings Romer hem nastavini. Avdije slavinaja amaro dive hem amen kotar Norrköpings Romer planirindam jekh dugo vreme ko akava dive te čera diso najšukar so šaj. Ljeljam jekh baro lokali hem isi amen but zoralji muzika. Amencar tane o čerenja maškaro čerenja - o Ramko hem o Zoran Šabanovic, a pratinena oljen o Leskovačka Zvezde. Amare čhaja ka čheljen folklor, otte tano o DJ-So čereja hem o čhabe so đilabena hip hop žanri o Hevzi hem o Seid.

- Šukare osetinava man ked dikhava e Romen ki kupa, sebepi akava tano e Romengoro najbaro prazniko. Me želinava sa e Romendje te oven najbare ko sveto, vačeri o pendžarutno vokalno artisti o Zoran Šabanovic.

- Šukjur so postoinena terne hem školuime čhave, phenela amari đivdi legenda o Ramadan Bislim - Ramko hem nastavini. O terne čhave kerena esavke manifestacie te keden e Romen ko jekh than hem te vekeren olenge kola tane, kotar avena hem kobor tano značajno olengoro Romano anav. O Romano anav tano but baro!



O Zoran Šabanovic hem o Ramko

O đando Lio

ISBN: 978-91-982463-2-2

Šaj te poručine ko: info@arlicenter.se

O đando Lio

Sead Šerifi - Sejo

